

Vier wunsje uch veuël sjpas en plezeër,

inne gezeëgende vasteloavend same, . . . alaaf!



Zaate Sjeng

Sjeng koam heem, laat, zaat vol beer
Zieng vrouw, die Sjeng geer op zieën nommer zat
Die sjprook sängerdaags gee woad mit hum
Dat houw Sjeng nog noeëts mitgemakt
Lets woar de "tent"nog te kling
Noe in 't vervolg, weëd op tiet durch gezakt
Dan is 't ummer rustig i de omgeving!

Jan Halmans

Vasteloavend is....

'n Traditie die vieër vuural motte beware,
Inne koers deë vieër motte blieve vare!
'n Sjtukske cultuur dat neet verloare mag goan,
'n bake dat in ozze welt mot blieve sjtoan!
'n Fieës dat lieët zieën wie 't ooch kint,
't Viefde joargetiej dat in november begint!
'n Oetloatklep vuur de luuj op vandaag,
'n Fieës vol plezeer dat zeët: pluk d'r daag!

Ron Logister.

Prinselijk gevoel

Op ene groeëte bontje wage
Mit blome ballonne en vanal
Sjteet hoeëg boave de Wieze Road
In vol ornaat Prins Karnaval
Langs de sjtroat sjteet 't rieje diek
Om de wage bij de klene ape
Die zingend en sjpringend zich vruije
En de veuële klumpkes rape
De prins zien vere waaije in de windj
Ene gulle lach op zien gezicht
Doe vriegs dich aaf weë is hie 't kindj?

Wiel Roeselers

Twieë glazer beer

't Ene glaas beer zeët teëge 't anger,

Doe bis sjeël, zeët 't anger glaas beer:
Doe bis zelf ene sjeële beër!

Jan van Haaf

Vasteloavend is..

Vasteloavend is mit al zien bontje kluëre wie inne reëgeboag,
Of luuj dat ooch waal allemaal ziën is meestal de groëte vraag!
Vasteloavend is vaak beëter wie ´n medicien,
´t verzach in jieder geval de groeëtste pien!
Vasteloavend hilt dich inne spegel vuur,
´t gieëf doa mit de luuj een realiteitskuur.
Vasteloavend liet dich vergeëte de alledaagse sjleur,
En zurgt doa mit vaak vuur een good humeur!

Ron Logister.

De geboarte van inne kloon

Wermde en geveul
Komme bie ee
Hart en zieël
Sjpieële mit ee

Hoe sjpas en vruijd
Veulbaar regeëre
Luuj zich treffe
Zingend, sjoenkelenteëre

En me de fiene humor
In de loch kint koare
Doa wurdt in jieëdere miensj
Inne kloon geboare

Wiel Roeselers

Carnaval en vastenoavend

Is inne tiejd om sjpas te make en oog om te bezinne
Want vueèr dat diej fiejrtig vastedaag beginne,
Höbbe v`r van te vueëre drij daag gek gedaan,
En wille dat neet gear ueëver sjloan,
Dan goan viejr oeët d`r bol
Omdat viejr houte van sjpas en lol,

Drij daag gek doeën, dan kikt ginne koad,
Es inne zate teage dich aan löpt op sjtroat,
Tot laat in de nacht, wueërd gezonge en gelacht,
Want de gekste dinger gebueëre onverwacht,

Gezelligheid kènt ginne tiejd,de klok tikt doeèr,
Want vueèr dat iejderèè heem is,doert nog inne toeèr.

Es diej drierj daag sjpas os good hōbbe gedoan,
Vergeat dan neet om `t Esjekrūtske hoale te goan,
Want Esjgoonstig hueèrt bij de Carnavalsviejring,
Jus wiej de unne bij inne hiejring,
D`r kloon heat me weer opgeborge tot volgend joar,
Al vilt dat menige carnavalsvierder sjwoar.

Jan Theunissen

Zate lūj

D`r ieēsjte reep: Jong wat ing lang trap wah!
D`r angere reep: Truuk!
Dat makt nieks, de ieënd is dat `t trapgelender zoeë lieëg zit!

Jan Halmans

Vasteloavend Viere

Goat d`r vasteloavend viere,
Wie al die anger kiere.
Geneet van sjpass en plezeer,
Drie daag lang, ummer weer.
Dink ins effe neet aan murge,
Of alle angere zake en zurge.
Doot uch ongeree verdrage mit die daag,
En goat uch neet aan de kraag.
Egelik zouw `t zoeë motte zun `t ganse joar,
Vrieheid, blieheid, geen bezjwoar.
Dat zal hoapelik geen illusie blieve,
Mér oeëts boave komme drieve.
Deë daag wachte vier mér rustig aaf,
Vuur noe: driemoal kreftig alaaf!!

Ron Logister.

Zoeë is de karnaval

Zoeë bontj wie de balonne
Zoeë sjtummig wie ´n rieke nonne
Zjwierig wie de polonaise
En sjtrak wie `t pekske van Therese
Nonchalant wie de jas van der kloneman
Glinsterend wie de ordes van der gardeman
Origineel wie de einzelgänger
Humoristisch wie de buutereedner
Werm wie de bontjmutsj van der kozak

Sjiek wie 't prinsepak
Zoeë ontsjutmig wie 'n dansmarieke
Geammeseerd wie de luuj die noa de optoch kieke
Sjtroalend wie de sjterre in de nach
Ontsjpanne wie de nar ziene lach
Sjpieëls wie 't jeugdprinsebal
Zoeë indrukwekkend is de karnaval

Wiel Roeselers

Carnaval

Mit carnaval breëk ich oet
Da houd ich 't neet mieë vol in de boet
't blood kruup woeë 't neet goan kin
En hub weer gooie zin
Vieër houte de traditie in ieëre
En goan drie daag carnaval vieëre
Da make vieër sjpas en plezeer
Mit ee sjnepske en good glaas beer
Vieër hoale alles va d'r sjtal
Vuur de auw wiever bal
Drij daag op nul os verstandj
Alle zurg zitte vieër a de kantj
Went de daag da zin vuuerbij
Zin vieër ooch weer bliej
Went alles weer achter os lik
Veult es of nuuj blood i-mich zit
En mit ee vusjke sjlete vieër aaf
Bis volgend joar alaaaf
Esjgoonsdich is alles weer gedoa
Es ich mit ee esjekruutske op heem a goa

Jan van Haaf

Vasteloavend is weer doa, mér kiek wiejer!

Sjuus 'n nuuj joar begos,
Geet d'r weer get los!
Went 't is weer zoeë wiet,
't is weer vasteloavestied.
Bontje kluëre, sjpas en plezeer,
Dat hubbe vier allemoal waal geer!
Uëveral weer prach en praal,
Prinse trikke van zaal tot zaal.
Sjtruije de vasteloavend in 't rondj,
Bringe vruijd, lache is gezondj!
D'r buuttereedner wirkt doa ooch op,
D'r zenger zit d'r zaal op d'r kop!
't is 'n geweldig fieës,

Drie dul daag is 't sjtraks weer pries!
Mér zieën ooch de boodsjap, de fantasie,
En bedink dich dan ooch de parodie.
Die vasteloavend toch ooch geweun is!
Went 't alledaagse leëve kint figuëre,
Die os deks ooch noch motte besjtuëre!
Die alleen mér oet zun op mach, sjtrak in pak,
Vasteloavend numt ze op de hak!
Lieët zieën dat de welt is van os allemoal,
Jieëdereë mit zien ege verhoal!
Jieëdereë is geliek, gene is verheëve,
Es vier dat beseffe, hubbe vier 'n beëter leëve!

In deë zin inne sjpetterende, knallende en gezeëgende vasteloavend!

Ron Logister.

Vreëme

Arabieëre en buërkes
Danse mit zigeunere en Grieke
Landjleupere en baronne
Gene zoekt uëver pieke
Sjpanjoeële en Volendammere
Sjpringe mit Turke en zjwarte
Al huppelt blie doe ree
Gene is ene aparte
Dat is wie v'r 't geer hubbe
Dat is ozze carnaval
Joamer dat noa esjgoonsdig
't samegeveul is gedoan
En vieër weer egewies
Ozze ege weeg goan

Wiel Roeselers

Vastelaovend in d'r hieëmel.

Es in d'r hieëmel juus es bie os d'r vastelaovend is,
Dan dansen alle ingelkes mit Bachus en mit Lazarus.
D'r Hergod op zien troeën bekiekt dat al op zien gemaak
En zaet dan bie zichzelf: "t is mer good dat ich ooch d'r vastelaovend hub gemaak!
Sint Joep hae tummert nog vlot aan 'nne hoondersjtal
Mer zaet dan:" Ich huur op Merie, want 't is carneval!"
't Merie werpt zich d'r sjuier aaf en wurpt de haore in d'r nak,
d'r Hergod zuut dat sjpilke aan en zaet:
"t is mer good dat ich d'r vastelaovend hub gemaak!"
't Magdalena zit mit 'nne ingel gezellig op 'n benkske
bie 't leeg van d'r sjeëmer en van 'n gans klein lempke...
d'r ingel drinkt zich 'nne sjoes en Magdalena 'n lekker vlemke!

D'r Hergod dae zich dat bekiekt dae zaet: "Dao wirt 't laat,
Mer daovuur is 't ooch mer good dat ich d'r vastelaovend hub gemaak!"
De ingelkes sjlunt zich 'n wölkske um de sjouwer
En Gabrieël pakt zich d'r groeëtse wolk, dae is ooch al get ouwer.
Ze danse en ze drinke "Hergodsbeer" en neemes dae wirt zaet
"Mer daovuur," zaet d'r Hergod "hub ich noe carnaval gemaak!"
Mer dan kump esjelegoonsdig, d'r Hergod dae zaet: "Sjtop!"
"Noe is alle sjpas am ende en v'r houte d'r mit op!
V'r gunt noe vaste mit os alle!" en hae kiek daobie in 't rond,
D'r Belzebug sjtikt zich nog gauw 'n sjtuksjke metwoeësj in d'r mond...
En alle ingele en ooch v'r, v'r zinge blie van zinne:
"Och Hergod leef, wat mooste v'r toch zonger Uch en carnaval beginne...?"

Els Boonen-van der Sterren

Meëdje

Ze sjton a gen tieëk
Sjiek age-doa
't Is vasteloavend en ze keek
En lachde i heurzelf
Noe konne ze mich zieë
Allenuj die mansluj hei

De mansluj kieke zich de oge oet
Ze zjwitde ee bietje
Ze woar get opgedrieëd
Ze sjtong doa al 'n tiedje
I Heur kot klidje
Ginne keel houw koeraasj heur
Get te vroage

Jan Halmans

D'r kloon

In 't circus van het leëve
Is d'r kloon een sjpeciale rol gegeëve.
Heë deet os ummer op zien ege maneer,
Amusere mit veuël sjpas en plezeer.
En 't lukt 'm jieëdere kieër opnuuj,
't tovere van inne lach op het gezich van alle luuj!
Mér hubbe v'r d'r ooch al ins uëver noagedach,
Wat zich versjuult achter deë gulle lach?
'n Miensj mit zoeë wie os allemoal,
'n miensj mit zien ege verhoal!

Ron Logister

Oppe Ouwe Mert

Lupt 't water doer de beëk
Reëgent 't confetti de ganse weëk
Hauwe dan de klone oppe kis
Witst-e datst-e oppe Ouwe Mert bis

Wiel Roeselers

Vasteloavend in Hergods paradies

In Hergods paradies is 't och carnaval.
De ingelkes en de duvelkes walse same op 't ingelebal!
Een duvelke zeët teëge 'n ingelke mit zien eugskes es kralle zoeë sjwat.
Doe bis mien leefste ingelke, ich duuj dich aan mien gluijend hart.
Der Lazarus sjut "Liebfraumilch", dat deut heë mit veuël plezeer.
En der duvel drinkt mit Belzebub 'n gleëske Duvelsbeer.
Der ouwe vader Petrus deë sjunkelt der op los.
En duujt zich ongetusje 't Apolonia aan de bros.
Sint Joeëzef mit in zien henj der nuuste Black & Decker,
Zuut om zich heër en zeët: "Verduld, dat geet hie lekker!"
Maria deet zich der sjluijer aaf en zit zich op der kop,
'ne gans verseerde hood mit vere boave drop!
De ingelkes zint oet rand en band en zinge zelfs "Alaaf!"
En rope teëge de reëgewulkskes: "Gier kriet drie daag vrie-aaf!"
Een duvelke danst der vuurdans mit heurekaes vlamvend roeëd,
Dat kumt doer al die ingelkes mit de sjuiwerkes get bloeët!
Der Hergod deë zich dat bekiek, deë toervelt om zich heen
Zet:"Ich hub welt daag en tied gesjoape,
Mer vasteloavend moog 't ummer zeen!

Els Boonen-van der Sterren

Vasteloavend is mieër

Vasteloavend is mieër dan 'n pilske drinke,
Wie raar dat vuur sommige luuj ooch maag klinke!
't Is dan waal geen maneer van leëve,
Mér vasteloavend kint dich zieëker richting geëve!
Weg oet de sjtress van ozze dagelikse sjleur,
Aafsjakele, inne vrieje kop en vuural geen gezeur!
Jieëdereë geliek, geen versjil tusje errem en riek,
Joa, de maatsjappie kint veuël lieëre van 't vasteloavesriek!
Want in os maatsjappie wurd d'r waal degelijk ongersjeed gemak,
En ze is kil en afstandelik, soms wurs-te d'r doeër geknak.
Vasteloavend lieët zieën wie 't ooch kint,
Tenminste es-te vuur degene deë 't begriep kint.
Sjleet neet de oge en blief vasteloavend viere en bedink dich,
Dat vasteloavend déks gieëf aan dees welt 'n sjoen gezich!

Ron Logister.

Dát is inne prins

Mit bontje veëre
Wie van inne pappegeij
Danst heë doeër de zaal
Mit sjpas en veuël beheij
conffetti dwarrelt
om heuëm bie
'n aardig meëdje
aan zien zie
De elveroad
Op gepaste aafsjtandj
Bekiekt dit sjpieël
Vanaaf de kantj
Zuut wie heë
Zich ieëwig vruijt
En zoeë sjpas
De zaal rond sjtruijt
Ze kieke zich aa
En knikke joa
Dát is inne prins
Loate v'r same goan
De polonaise
trikt zoeë weer
mit sjpas en vruijt
Doeër Limburg heer

Wiel Roeselers

Tieëke kaal

Ich sjnep hei gaar nieks va,
Ummer weëd ich zat va ée kling gleëske sjnaps.
Van inne mar? Dat is waal ópmerkelig.
Joa, en wits-te wat nog gekker is?
Mieëstal 't twelfde!

Jan Halmans

't Is weer Vasteloavestied

't Is weer vasteloavestied,
Dat wille vier noeëts mieër kwiet.
Op d'r 11e van d'r 11e begint 't weer,
't fieës van sjpas en plezeer.
In de adventstied inne korte sjtop,
Mér vanaaf januari gont vier op noa d'r top.
D'r prins lieët zich zieën van zieën biste kantj,
En trikt dan mit zieëne road van 11 doeër 't vasteloavendslandj.

Doomit kondigt heë de koms aa van de drie dul daag,
Drie daag woëë in nieks mot en alles maag.
Vier zunt mit die daag allemoal beklop,
En zitte de welt op ziene kop,
Zoeë woar 't ooch oeëts bedach,
Kieke in d'r sjpeegel mit inne gulle lach!
Dooch mit, amuseer dich en geneet van de tied,
Dan hub-ste ooch later ginne sjpiet!

Ron Logister.

Ammesere?

Vasteloavend is tradisie
Karnaval is 'n fieës
Sommige begriepen dat neet
En gedrage zich wie 'n bieës
En noa heer huërs-te ze
Ummer blieve zeëge
Wie ze zich dege ammesere
3 Kieër gesjpiet en i de gut geleëge

Wiel Roeselers